

## Teño un amor en Rianxo/Vento mareiro

Teño un amor en Rianxo e outro en Vilagarcía,  
para ve-los meus amores, teño que cruza-la Ría,  
teño que cruza-la Ría, teño que cruza-la Ría,  
teño un amor en Rianxo e outro en Vilagarcía.

*Non lle temas, mariñeiro, ó ventíño do mar,  
que co vento mareiro dá mellor navegar.  
Se navegas pola ría de Rianxo verás  
as estrelas e a lúa darlle bicos ó mar.*

Lévalle no teu peteiro, gaivotiña voa, voa,  
lévalle no teu peteiro unha cartiña de amores  
pró meu amor rianxeiro ( 3 veces)  
gaivotiña voa, voa, lévalle no teu peteiro.

*Non lle temas, mariñeiro...*

Vai pola noite a escoitar.  
Cando vaias a Rianxo vai pola note a escoitar  
as estrelas e a lúa os biquiños que se dan; ( 3 veces)  
os biquiños que se dan; ( 3 veces)

cando vaias a Rianxo vai pola noite a escoitar.

*Non lle temas, mariñeiro...*

## Eu namorar namoreime

Eu namorar, eu namorar, eu namoreime,  
eu namoreime na beira do mar,  
enguedellar, enguedellar, enguedelleime,  
enguedelleime na beira do mar.  
Eu namoreime dunha rapaciña,  
xa non me puiden desenamorar.

*Eu namorar...*

Enguedelleime dunha rapaciña,  
xa non me puiden desenguedellar.

*Eu namorar...*

## Nos caneiros

(Ai, Pepiño adiós)

Ai Pepiño, adiós, ai Pepiño, adiós,  
ai Pepiño, por Dios non te vaias,  
non te vaias afogar á praia,  
como nos pasou a nós  
e havos de pasar a vós.

Ai Sálvora, ai San Vicente, BIS  
as nenas bonitas hainas en Ourense.  
(as nenas bonitas hainas en Ourense)

Ai Pepiño, adiós, ai Pepiño, adiós,...

Sálvora, ai San Vicente  
Ai Sálvora, adiós Mourente  
Ai Sálvora, ollos da ría  
para boas mozas, en Vilagarcía. BIS

Ai Pepiño, adiós, ai Pepiño, adiós,...


Sálvora, vento norteiro.  
Ai Salvora, meu compañeiro,  
Ai Sálvora, vento ventíño  
xa están as rapazas na punta de Aguiño. BIS

## Letras Galegas 2012

Marcando as nosas letras

## Embarcados nun Cantar

o mar é o noso patrimonio



Marín ten un areal...

Ahí andan as lanchas do xeito...



[www.lefredecaldereta.com](http://www.lefredecaldereta.com)

[lefre@lefredecaldereta.com](mailto:lefre@lefredecaldereta.com)

## Cantiga

Unha noite na eira do trigo  
ó reflexo do branco luar,  
unha nena choraba sin trégoas  
os desdés dun ingrato galán.

E a coitada entre queixas decía:  
"Xa no mundo non teño ninguén,  
vou morrer e non ven os meus ollos  
os olliños do meu doce ben".

Os seus ecos de malenconía  
camiñaban nas alas do vento,  
e o lamento repetía:  
"¡Vou morrer e non ven o meu ben!"

Lonxe dela, de pé sobre a popa  
dun alevé negreiro vapor,  
emigrado, camiño de América  
vai o probe, infelís amator.

E ó mirar as xentís anduriñas  
cara a terra que deixa cruzar:  
"Quen puidera dar volta -pensaba-,  
quen puidera convosco voar!..."

Mais as aves e o buque fuxían  
sin ouvir seus amargos lamentos;  
sólo os ventos repetían:  
"¡Quen puidera convosco voar!"

Noites craras, de aromas e lúa,  
desde entón ¡que tristeza en vós hai  
pros que viron chorar unha nena,  
pros que viron un barco marchar!...

Dun amor celestial, verdadeiro,  
quedou sólo, de bágoas a proba,  
unha cova nun outeiro e  
un cadavre no fondo do mar.

## O gato

Xuntáronse catro un día,  
os millores deste barrio,  
mataron un gato a tiros  
e o meteron nun saco.

*Vai o gato metido nun saco,  
vai o gato prá terra da Laxe;  
vai o gato metido nun saco,  
ai, gatiño! xa non volve máis.*

Que mal lles parecería  
a calquera deses catro,  
que os meteran nun saco  
como meteron o gato.

*Vai o gato...*

Aquel gato era un artista,  
traballaba na ribeira,  
agora é un bañista  
na praia da Castiñeira

*Vai o gato...*

## O rodaballo

Nunha lancha de Marín  
coa proa de carballo, BIS  
catro rapaces da Pobra  
ui, ai, ai, ui, ai, ai  
roubaron un rodaballo. BIS

*Mala chispa te coma,  
mala chispa che dea,  
mala chispa te trague,  
ai, ai, ié. BIS a estrofa*

O patrón que os mandaba  
tamén era de Marín BIS  
e díxolle ao rodaballo:  
ui, ai, ai, ui, ai, ai  
moito miras para min! BIS

*Mala chispa...*

Fórono vender á lonxa  
e con moito disimulo BIS  
e quen o foi a comprar  
ui, ai, ai, ui, ai, ai  
a filla do Cachirulo! BIS

*Mala chispa ...*

Aquí se acaba a historia  
deste peixe rodaballo BIS  
que por non haber aceite,  
ui, ai, ai, ui, ai, ai  
houbo que comelo asado. BIS

*Mala chispa...*

## San Fins

Pensa miña nai que estou  
pescando na carballeira

i estou no San Fins do Castro  
bailando unha muiñeira

A miña nai porque que puido  
fixo unha casa na illa

para ver os de Neaño  
como pescan a sardiña

o cura de Corme e xastre  
malpican e mariñeiro

o de Pazos Labrador  
e o de Cesullas gaiteiro

## Catro vellos mariñeiros

Catro vellos mariñeiros, BIS  
todos metidos nun bote.  
Boga, boga, mariñeiro,  
imos pra Viveiro,  
xa se ve San Roque. BIS

*Ailalelo...*

## Na beira do mar

Ollos verdes son traidores, BIS  
azules son mentireiros,  
os negros e acastañados  
son firmes e verdadeiros. BIS

*Na beira, na beira, na beira do mar  
hai unha lanchiña pra ir a navegar BIS*

Vinte hoxe pasar a ría BIS  
cuns zoquiños de madeira,  
ías tan remangadiña  
ó pasar pola riberia BIS

*Na beira, na beira, na beira do mar  
hai unha lanchiña pra ir a navegar BIS*

Cinco sentidos che temos, BIS  
os cinco necesitamos  
pero os cinco che perdemos  
en canto nos namoramos

*Na beira, na beira, na beira do mar  
hai unha lanchiña pra ir a navegar BIS*

## A Rianxeira

*Ondiñas veñen,  
ondiñas veñen,  
ondiñas veñen e van.*

Non te vaias rianxeira,  
(non te embarques rianxeira)  
que te vas a marear.

A Virxe de Guadalupe  
cando vai pola ribeira, BIS  
descalciña pola area,  
parece unha rianxeira. BIS

*Ondiñas veñen...*

A Virxe de Guadalupe  
cando vai para Rianxo,  
(cando veu para Rianxo)  
a barquiña que a leva  
(a barquiña que a trouxo)  
era de pau de laranzo.

*Ondiñas veñen...*

A Virxe de Gauadalupe  
quen a fixo moreniña BIS  
(quen te puxo moreniña)  
foi un raíño de sol  
que entrou pola ventaniña. BIS

*Ondiñas veñen...*

Os mariñeiros traballan BIS  
de noite coa luz da lúa.  
Dá gusto velos chegare  
pola mañá cedo  
cheirando a frescura. BIS

*Ailalelo...*

Levo sardiña e bocarte,  
(traio sardiña e bocarte)  
vendo xurelo pequeno.  
(tamén xurelo pequeno)  
Rapaciña de Viveiro  
ven buscar o lote  
do teu mariñeiro. BIS

*Ailalelo...*

## Amoriños collín

Amoriños collín  
na bieriña do mar,  
amoriños collín  
non os poido olvidar;  
non os poido olvidar  
non os poido olvidar,  
amoriños collín  
na beiriña do mar.

## O meu barco

Teño un barco de xoguete  
e nel me quero embarcar.  
Polos mares dos meus soños  
¡quen me verá navegar!

Navegarei por mil ríos,  
sete mares hei cruzar.  
¡No meu barco de xoguete  
cansarei de viaxar...!

¡No meu barco de xoguete,  
mariñeiro e capitán...!  
¡Non teño medo ó trebón  
nin me asusta o furacán!

¡O meu barco de xoguete!  
¡O meu barco moito val:  
verei terras, verei illas,  
verei mares de coral...!

¡Andiven tódolos mares!  
¡Xa cansei de navegar  
co meu barco de xoguete  
sin salir do meu fogar!